

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 10/12

24 մայիսի 2016 թ.

Քննարկվեց «Նեկտարբոնուս» ՍՊԸ գանգատը 2016թ-ին ընկերությանը շրջանառության հարկ վճարող չհամարելու վերաբերյալ:

«Նեկտարբոնուս» ՍՊԸ գանգատում բերված փաստարկները.

Բուսական հումքից յուղեր և օշարակներ արտադրող «Նեկտարբոնուս» ՍՊԸ միկրոձեռնարկության 2014թ-ի շրջանառությունը կազմել է 5.998.330 դրամ: Ընկերության կողմից 2015թ-ին ներկայացվել է շրջանառության հարկ վճարող համարվելու վերաբերյալ հայտարարություն և համարվել է շրջանառության հարկ վճարող: 2015թ-ին ձեռնարկության շրջանառությունը կազմել է 6.428.510 դրամ, սակայն 2016թ-ին ձեռնարկությունը ծանուցում չի ստացել շրջանառության հարկ վճարող համարվելու վերաբերյալ հայտարարություն ներկայացնելու անհրաժեշտության մասին և համապատասխան հայտարարությունը չի ներկայացրել:

Հարկ է նշել, որ կազմակերպությունն ունի ընդամենը 5 աշխատող և այն ժամանակահատվածում, երբ պետք էր ներկայացնել վերոհիշյալ հայտարարությունը, կազմակերպության տնօրենը առողջական լուրջ խնդիրներ է ունեցել (իշեմիկ ինսուլտ):

Ելնելով վերոգրյալից՝ գանգատաբերը խնդրում է հաշվի առնել ընկերության տարեկան շրջանառության չափը և հնարավորություն ընձեռել 2016թ-ին ևս հանդես գալ որպես շրջանառության հարկ վճարող, քանի որ ԱԱՀ վճարող համարվելը խիստ բացասաբար կանդրադառնա ընկերության ֆինանսական վիճակի վրա և կարող է հանգեցնել վերջինիս լուծարմանը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ «Նեկտարբոնուս» ՍՊԸ կողմից սահմանված կարգով ներկայացվել է 2016թ-ի 1-ին եռամսյակի շրջանառության հարկի հաշվարկը, սակայն համակարգն այն չի ընդունել: Հարկային տեսչությունում պարզաբանվել է, որ 2015թ-ի ընթացքում «Շրջանառության հարկ վճարող համարվելու վերաբերյալ ծանուցագիր» հանձնված լինելու պայմաններում, ընկերությունը պարտավոր էր ինքնուրույն՝ «Շրջանառության հարկի մասին» ՀՀ օրենքով սահմանված կարգով, ներկայացնել շրջանառության հարկ վճարող համարվելու վերաբերյալ հայտարարություն: Սակայն, նշված հայտարարությունը չներկայացվելու հետևանքով ընկերությունը 2016թ-ում համարվել է ավելացված արժեքի հարկ վճարող:

Վերոգրյալի կապակցությամբ հարկ է նշել հետևյալը.

«Շրջանառության հարկի մասին» ՀՀ օրենքի 4-րդ հոդվածի 1-ին մասի համաձայն. «Հայաստանի Հանրապետությունում շրջանառության հարկ վճարող կարող են համարվել սույն հոդվածի 2-րդ մասով սահմանված պայմանները

բավարարող Հայաստանի Հանրապետության ռեզիդենտ համարվող առևտրային կազմակերպությունները, անհատ ձեռնարկատերերը և նոտարները, այդ թվում՝ նոր ստեղծված (պետական գրանցում ստացած կամ հաշվառված) հարկ վճարողները (այսուհետ՝ անձինք), բացառությամբ սույն հոդվածի 3-րդ մասում նշված դեպքերի՝

1) յուրաքանչյուր տարվա հունվարի 1-ից մինչև այդ տարվա ավարտը (բացառությամբ օրենքով նախատեսված՝ տարվա ընթացքում ԱԱՀ վճարող համարվելու դեպքի), եթե մինչև այդ տարվա փետրվարի 20-ը իրենց հաշվառման վայրի հարկային մարմին են ներկայացրել վերադաս հարկային մարմնի ղեկավարի հաստատած ձևով շրջանառության հարկ վճարող համարվելու վերաբերյալ հայտարարություն.»::

Իր հերթին, «Շրջանառության հարկի մասին ՀՀ օրենքում փոփոխություններ և լրացումներ կատարելու մասին» 21.06.2014թ. ՀՕ-128-Ն ՀՀ օրենքի 10-րդ հոդվածի համաձայն՝ շրջանառության հարկ վճարող համարվելու վերաբերյալ հայտարարություն ներկայացնելու վերջնաժամկետը կիրառվում է միայն այն դեպքում, եթե հարկային մարմինը հարկ վճարողին ծանուցել է օրենքով նման վերջնաժամկետ սահմանված լինելու մասին: Եթե հարկային մարմինը նշված ծանուցումը հարկ վճարողին ուղարկում է շրջանառության հարկ վճարող համարվելու վերաբերյալ հայտարարություն ներկայացնելու համար օրենքով սահմանված ժամկետներից հետո, ապա որպես շրջանառության հարկ վճարող համարվելու վերաբերյալ հայտարարության ներկայացման վերջնաժամկետ սահմանվում է հարկ վճարողին ծանուցումը տրամադրելու օրվան հաջորդող 7-րդ աշխատանքային օրը:

Տվյալ դեպքում գանգատաբերը պնդում է, որ հարկային մարմնի կողմից նշված ծանուցումը, այն է՝ «Շրջանառության հարկ վճարող համարվելու վերաբերյալ ծանուցագիր»-ը, իրեն չի ուղարկվել (սահմանված կարգով չի տրամադրվել):

Սույն գործում առկա ապացույցների ուսումնասիրության արդյունքում Հանձնաժողովը եկավ եզրակացության, որ «Շրջանառության հարկ վճարող համարվելու վերաբերյալ ծանուցագիր»-ը գանգատաբերին սահմանված կարգով չի ուղարկվել (չի տրամադրվել):

Ելնելով վերոգրյալից և ղեկավարվելով «Շրջանառության հարկի մասին ՀՀ օրենքում փոփոխություններ և լրացումներ կատարելու մասին» 21.06.2014թ. ՀՕ-128-Ն ՀՀ օրենքի 10-րդ հոդվածի դրույթներով, Հանձնաժողովը գտնում է, որ շրջանառության հարկ վճարող համարվելու վերաբերյալ հայտարարություն ներկայացնելու վերջնաժամկետն ընկերության նկատմամբ տվյալ դեպքում կիրառելի չէ, քանի որ հարկային մարմինը սահմանված կարգով չի ծանուցել օրենքով նման վերջնաժամկետ սահմանված լինելու մասին:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո ռ ո շ ու մ Է՝

«Նեկտարբոնուս» ՍՊԸ գանգատը բավարարել:

Հանձնաժողովի նախագահ՝



Վ.ՄԻՐՈՒՄՅԱՆ